

lis Gnovis

■ **LIGNAN.** Tal parc zoo une gnove ospite



Daspò de sierade par l'Invier, il prin di Avrìl, ma cence pes di sorte, si è tornât a vierzi il Parc Zoo di Lignan, cuntune gnove sorprese: une piçule di camèl di pôcs mès, che i àn metût non Fosca (*te foto, cu la so mame*), e che si viôt za sgripiâ sot lis gobis di mame camèl, par mostrâsi cu la gracie feminine. Ma la gnove rivade si cjate in bieles compagnie cun altris animâi che a sticin la ammirazion dai visitadôrs: il drâc de barbe, origjinari des zonis desertichis de Australie, che al fâs dutune cun altris bestiis che a rivin simpri di chê tiere lontane: i uallabi, o ben piçui marsupiâi che a somein a un cangûr. Al vâl la pene di fâ un scjampon a Lignan, dulà che Fosca e compagnie a spietin i umans par mostrâur ce bieles che e je la nature, e par imparâ a tignile di cont.

■ **SAN VÏT DEL TOR.** Dute colpe di un algoritmi

Insume, a Sant Vît de Tor, par chel che al inten il servizi di racuelte des scovacis, che al è in man ae Net, citadins e amministrazôrs si ritegnin presonîrs di un algoritmi, che al è une secuencia finide e ordenade di istruzions par risolti un probleme, che tal câs in cuistion al è chel de determinazion de tarife di paiâ al gjestôr pe racuelte des scovacis. La tarife, di fat, no ven determinade dal Comun che dut câs, par leç, al scuen cuvierzi il 100 par cent dal cost, ma di un algoritmi, bestie nere dal Plan Economic e Finanziari creât de Net. Citadins, Sindic e Assessôr a bruntulin parcè che lis tarifs, tal lôr Comun, a son di primât, come lis boletis che a rivin ai citadins. Cussi si lamentin, no dome par un servizi che nol sodisfe, viodudis lis tarifs, ma anche pe dificolât di vê une rispueste clare e nete de Net su cemût che e ven calcolade la tarife e i auments che i van daûr, che al somee che nancje il gjestôr lu savedi. E se al puest dal algoritmi si metès, come une volte, un brâf resonîr di chei jessûts dal Zanon?

■ **UNIVERSITÂT DAL FRIÛL.** No dome "mai strassâ", ma reonâ

Tal mont di vuê, si fâs di dut par strassâ ogni ben di Diu. Ancje prodots che no son di butâ vie, come chei ortofrucitui "fûr di calibrî", par vie che cu lis lôr misuris no jentrin magari tes casselis che o viodin tai supermarcjâts. Si trate di prodots che a vegnin



considerâts di scartâ! La Universitât dal Friûl e à pensât a un progjet sostignibil no dome pal setôr alimentâr: si trate dal progjet "United", bienâl, di realizâ cul Consei Nazional des Ricercjis e la Universitât de Tuscia. Si stan svilupant gnovis farinis di liûms dal gust neutri, adatis ae preparazion di dolçs, ma anche altris progjets di bioconversion par produsi cellulose bateriche. E si larà ancjemò indenant, no strassant, ma fasint reonâ, come che a fasevin i nestrîs viei, dut chel che la nature nus da.

Miercus 15 S.tis Basilisse e Nastasie

Joibe 16 S.te Bernardete

Vinars 17 S. Nicêt

Sabide 18 Dedicazione de Catedrâl di Udin

Domenie 19 III Domenie di Pasche

Lunis 20 S.te Sare

Martars 21 S. Ansel

Il timp Un tic par sorte.



Il soreli

Ai 18 al jeve aes 6.21 e al va a mont aes 19.54.



La lune

Ai 17 Lune gnove.

Il proverbi

La aghe in bocje e distude il fûc.

Lis voris dal mès

Tal vuestri ort rarit lis plantis cressudis masse fissis. Prontait par ben i supuarts pai cesarons.

Cronichis dal taramot: chê sere in cimitieri

Ancje il cimitieri di Glemone al veve il so biel viâl arborât, cu la file ordenade dai ciprès, che a someavin compagnâ tal cidin la procession meste daûr dal muart che al lave a polsâ par simpri. Come une volte, chel viâl lu vevin clamât "Via Sacra", e al finive intun slarc propit denant de jentrade principâl dal cimitieri, che a çampe tu olmavis, a voli lunc, la plane dal país, e a drete la scjalnade maestose che si rimpinave sù pe culine fate a scjalons, dulintor cencenâts di une alte muraie, scuasit a protezi chês animis che a polsavin dentri il so cûr. Che la muart e fos un nivel, ancje a Glemone, e je veretât di fede, pai muarts, e ancje par un riclam leterari, ma un pôc di mancûl pai vîfs.

Di fat, sul or di ogni scjalon, sedi a çampe che a drete, si jevavin sù capelutis, statuis e monuments di marmul e di buine fature, cui nons di defonts di fameis abenadis, cognossudis, ma ancje dai monsignôrs, predis e muinis, che cence volê a çalavin dal alt in bas chês simplicis sepolturis, magari cun dome une crôs, une fotografie e une date, e dut ben in ordin, in file, in perfete simetrie, une vicine a chê altre, cussi di tignîsi un pôc in compagne. Ma in chês seris di Mai, daspò de scossade dal orcolat sbeleo, si jere ribaltât ogni ordin, stravuelte ogni simetrie, fasint diventâ il cimitieri un davoi dulà che, magari cence ordin, lis vitimis de sô furie a vevin di cjatâ acet. I cuarps tudâts che mans pietosis a rivavin a robâ aes maseris che ju vevin acuelts tal lôr grim, si ingrumavin tal plaçâl dal cimitieri, in spiete di un recuie, une benedizion, une lagrime se a 'ndi jere vanzade ancjemò cualchidune, e di une sepolture. Ma a jerin tancj chei cuarps sfigurâts, che no si rivave a daûr pàs a di ducj.

In cimitieri, chê zomade, al jere il gno



Part dal cimitieri di Glemone

...Cualchi volte, sul cadavar cence non, al jere poiât un ogjet, che al jere stât so. Suntune piçule bare blancje e jere poiade une pipine che e veve volût compagnâ ta chel ultin viaç la sô paroncine...

amî Armando (recuie), che mi veve visât che a une cierte ore al varès vût di lassâ il so compit, e mi preave di sostituili. Ma prime che o ves pensât cemût fâ, cualchidun dal Comun mi visave che e sarès rivade une segnalazion, no ricuardi de bande di quale autoritât, che la situazion de sepulture des vitimis, che e stave lant indenant masse planc, e par vie che diviers cuarps a jerin in decomposizion ancje cause dal cjalt di chês zornadis, al esistev un seri pericol di epidemie, e che bisugnave fâ front prime pussibil. Mi vevin visât par vie che o jeri assessôr ae Assistence, Sanitât e Igjienne, che a jerin i miei referâts. O domandai al vicesindic di visâ la mê femine di no preocupâsi, che o sarès tornât a çase une vore tart, parcè che o vevi un incuintri impuartant. Al jere l'incuintri in cimitieri. Tal plaçâl si metevin adun i cuarps che i socoridôrs a puartavin cemût che a podevin: intun sac di plastiche o magari involuçâts intune cuvertine, o cui vistîts che a vevin cuant che il

mont ur jere colât aduès, ma sporçjâts di sanc e dal blancôr des maseris. Prime di cirî une bare dulà meti chei cuarps lambicâts, si cirive di savê se a jerin stâts ricognossûts, o se il taramot, di là de vite, ur ves gjavade ançe la identitât. Al mancûl savê il puest dulà che a jerin stâts cjatâts: la vie, al mancûl il borc, di scrivi suntun bilietut di meti parsore de bare, ma no simpri i socoridôrs, massime se a vignivin di fûr, a jerin bogns di rispuiandi.

Cualchi volte, sul cadavar cence non, al jere poiât un ogjet, che al jere stât so. Suntune piçule bare blancje e jere poiade une pipine che e veve volût compagnâ ta chel ultin viaç la sô paroncine. Tra lis personis che a jerin vignudis a cirî se tra chei muarts al fos cualchidun di çase, come intune moderne danze macabre, blancjis fantasmis cun mascarîs par respirâ, a balinavin dulintor des baris sborfant, des lôr pompis compagnis chês che si da sù il sulfât, la creoline, un disinfectant che al jentrave parfin dentri tai vues.

Si faseve scûr, e pûr e coventave la lûs par podê lâ indenant cu lis sepolturis. Le çatai sul stradon: e jere una fotoelettriche, no mi visi se dal Esercit o dai Pompîrs, montade suntune camionete, che o compagnai in cimitieri. Cun chê lûs, dôs pacaris, che une e sgjavave e chê altre e taponave, e un dipendent comandât dal Comun di Udin che al tignive chê contabilitât pietose, si lavorâ fin a buinore. Strac, mi jeri sentât vicin di un slambri de muraie di cengle. Mi svearin une scossute e il rumôr metalic dai modons de muraie che e jere colade. Tal sturniment di chel moment, mi pareve che la muart, strache, si fos sentade par polsâ dopo chê vendeme di animis inocentis, e che un agnul al vaîs, viodint chê procession beade.

Roberto Iacovissi

Peraulis in dismentie

par cure di Mario Martinis

> FRUTE

s.f. = bambina, ragazza, fanciulla (frut al maschile) (presente nell'ambito agricolo-pastorale friulano antico nel senso di 'piccolo di animale', continua il latino fructūs 'godimento; usufrutto; frutto, prodotto; guadagno; vantaggio; soddisfazione')

La frute prime di lâ a dormî e lei une conte. La bambina prima di andare a dormire legge un racconto.

> FUIACE

s.f. = focaccia, schiacciata, stacciata (dal latino tardo focacia(m) 'focaccia', da fōcus 'focolare' sul quale si cuoceva)

Carli al met dôs fueis di vît sore lis fuiacis.

Carlo mette due foglie di vite sopra le focacce.

"Sin a Pasche, e si viodin gran fujazzis pes buteghis, pes plazzis..." (Zor II, 490)

> FUMATE

s.f. = nebbia (leggera) (denominale di fumatâ 'annebbiare (si dice delle biade che strette dalla nebbia non abboniscono durante la fioritura)')

Il soreli al sfante la fumate subite dopo la albe.

Il sole fa svanire la nebbia subito dopo l'alba.

"...di sore di che lungje code di blancje fumate..." (Cont 1868, 20)

> FUMUL

agg. = fumolento, dal colore del fumo, grigio scuro (dal nome latino fūmus 'fumo; vapore', voce panromanza)

La gjate rosse e à fat un gjatut fumul.

La gatta rossa ha dato alla luce un gattino grigio scuro.

> FURDUCJE

s.f. = succhiello di piccole dimensioni (da confrontare con furducjâ, fruducjâ, 'succhiellare')

Passimi la furducje che o ai di fâ une buse te bree.

Passami il succhiello che devo fare un buco sulla tavola di legno.